

**Timersorneq timigissarnerlu pillugit Inatsisartut inatsisaata allanngortinneqarnera  
pillugu Inatsisartut inatsisaat**

*Ilinniartitaanermut, Kultureqarnermut Timersornermut Ilageeqarnermullu Naalakkersuisumit  
saqqummiunneqartoq*

**pillugu**

**Kultureqarnermut, Ilinniartitaanermut, Ilisimatusarnermut Ilageeqarnermullu  
Ataatsimiititaliap**

**siunnersuutip aappassaaneerpeqarneranut**

**ISUMALIUTISSIISUTAA**

Ataatsimiititaliap suliarinninnermini inuttarai:

Inatsisartunut ilaasortaq Nivi Heilmann Efraimsen, Inuit Ataqtigiit, siulittaasoq  
Inatsisartunut ilaasortaq Isak Johannessen, Naleraq, siulittaasup tullia  
Inatsisartunut ilaasortaq Margrethe Thårup Andersen, Demokratiit  
Inatsisartunut ilaasortaq Karen-Marie Kyed Frederiksen, Demokratiit  
Inatsisartunut ilaasortaq Nivi Rosing, Inuit Ataqtigiit

UPA2026-mi ulloq 28. april 2026 siullermeerinerup kingorna ataatsimiititaliap siunnersuut misissorpaa.

**Siunnersuutip imarisaa siunertaalu**

Esportip qarasarsorlunilu unammiaarnerit unammiaarluni timersuutitut ilanngunnissaasa akuerineqarnissaa siunnersuuteqarnermi siunertarineqarpoq. Akuerineqarnerisigut kattuffiit peqatigiiffiillu esportimik qarasarsorlunilu unammiaarnernik ingerlataqartut Naalakkersuisunit tapiiffigineqarsinnaatitaalersinnaapput.

Kiisalu Nakorsaatit Pissasaatitut Atorneqarnerinut Kalaallit Nunaanni Akiuisut allattoqarfimmit sullinneqarnerata Kalaallit Nunaanni Timersoqtigiit Kattuffiannit Naalakkersuisunut nuunneqarnissaa siunnersuutigineqarpoq. Tamatuma saniatigut Naalakkersuisut aalajangiisartunut allaffissornikkut aningaasaliissapput. Nakorsaatit Pissasaatitut Atorneqarnerinut Kalaallit Nunaanni Akiuisut suleqatigiinnissamut pisussaaffiitut immikkut kattuffiit timersoqtigiiffiillu Kalaallit Nunaanni Timersoqtigiit Kattuffiata avataaniittut ilanngunneqassapput.

Kalaallit Nunaanni Timersoqatigiit Kattuffiat suli tassaassaaq Kalaallit Nunaanni timersornikkut timigissarnikkullu aaqqissugaasumik ingerlataqarnermut nuna tamakkerlugu pisortatigoortumik sinniisoq. Timersuutitut immikkut kattuffiit aammalu timersuutitut peqatigiiffiit Kalaallit Nunaanni Timersoqatigiit Kattuffiannut ilaasortaanningsut eqqarsaatigalugit immikkut kattuffik pineqartoq pisortatigoortumik ingerlatsinermi Kalaallit Nunaannut sinniisuussaaq.

Pisortatigoortumik ingerlatsisoqarnerani Elite Sport Greenland Kalaallit Nunaanni Timersoqatigiit Kattuffiat imaluunniit immikkut kattuffik attuumassuteqartoq suleqatigalugit Kalaallit Nunaannut sinniisuusarpoq.

### **Siunnersuutip Inatsisartunit siullermeerneqarnera**

Siunnersuut siullermeerinninnermi tapersorsorluarneqarpoq. Tamatumalu peqatigisaanik esportimik ingerlatsisut pitsaanagerusunik atugassaqaassappata Tusassip suliassaqaarfiani aaqqiissutissanik pitsaanagerusunik Naalakkersuisut saqqummiussisariaqarnerat oqaluuserineqarpoq. Kiisalu esportimut pitsaanngitsumik kingunerluutaasinnaasut isumakuluutigineqarnerat oqaatigineqarpoq.

### **Siunnersuutip aningaasaqarnikkut kingunerisassai**

Siunnersuut pisortanut aningaasaqarnikkut allaffissornikkullu kinguneqassanngilaq.

### **Ataatsimiititaliap siunnersuummut oqaaseqaatai**

Esportip qarasarsorlunilu unammiaarnerit unammiaarluni timersuutitut nunani allanisut akuerineqarnissaat ataatsimiititaliamit pitsaasutut isigineqarpoq. Aammalu Nakorsaatit Pissasaatitut Atorneqarnerinut Kalaallit Nunaanni Akiuisut Kalaallit Nunaanni Timersoqatigiit Kattuffiannit avissaartinneqarnissaa, taamaalillutillu suleqatigiinnissamut pisussaaffiunik annertusineq, ataatsimiititaliamit pitsaasutut isigineqarpoq.

**Ataatsimiititaliap inassuteqaatai**

- Ataatsimiititaliami amerlanerussutillit, Demokraatineersut aamma Inuit Ataqtigiiinneersut, siunnersuut akuerineqassasoq inassutigaat.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

---

Nivi Heilmann Efraimsen  
Siulittaasoq

---

Isak Johannessen  
Siulittaasup tullia

---

Margrethe Thårup Andersen

---

Karen-Marie Kyed  
Frederiksen

---

Nivi Rosing